

san naaninan - nimirò 35
zanwuye kalo - san 1975

bp 24
bamakò
mall

dòròmè 4 — cop : 0155

kibaru

a bë bò mali kibarudiso ka yamaruya kònò

musow jòyòrò jamana jòli la

k'a daminè desanburu kalo tile 28 na, ka t'a bila a tile 30 la, san 1974 kònò, mali musow ye jèkasigiba dò kè bamakò,

jèkasigi in sen fè, musow da magara u yèrè jòyòrò la jamana ka nyètaa sabatili sira kan. u ni cèw ka kan ka damakènyè cogo min na jamana jòli la, u ka kan ni bonya ni kunkòròta min ye, musow ye nin bée fèsèfèse u ka nyògonyeba in sen fè.

tònsigi laban na, u ye muso minw sigi nyèmògoya la, olu tògò filè : kuntigiba : mariyamu tarawele kuntigiba dankan : fatu tali sèbèn w nyènabòbaga : safiyatu jara tòn kòkan kow nyènabòbaga : awa jalo asetu tarawele

tòn ka baaraw laoènbagaw : tenènba bagayoko fanta jalo sòrò ni hadamadenya konyèw nyènabòbaga : ulematu keyita sokina si fariman keyita



tòn kunnafo ni dibaga : awa keyita warimarala : asita sumare

warimarala dankan : nyamoyi sise jateminèlaw kòlòsibagaw :

pènda jàwara umu jakite denmisènw ka konyèw nyènabòbaga : nene tali

baarakèlaw ka konyèw nyènabòbaga : mari fofana

fonyògònkò nyènabòbaga : rene jara jenebu tarawele fanta jakite

tòndenw yamaruyalenw : tara kamara muso jèkulu minw sigilen bë an ka jamana mara wòord kelen kelen bée kònò, olu kuntigiw.

sukaro sòngò ma yèlèma

bée b'a dòn ko waati dò kèra, sukarò gèlèyara bamakò dugu kònò : a yeli tun ka gèlèn, a sanni fana tun ka gèlèn. bée dun b'a dòn ko mali kònò, sukarò sòngò ye dòròmè 87 ye, nka dòw b'a feere da la, min ka ca ni dòròmè 87 ye.

o tuma na, jago konyè minisitiri asimu jawara ye kunnafo ni sukarò sòngò gèlèyali kan. minisitiri asimu jawara y'a jira ko dò farala sukarò sòngò kan jamana dòw la. o kèra sababu ye, min y'a to jagokèla dòw ye sukarò caman san, k'a mara. o kèra sababu ye ka sukarò sòròli gèlèya, k'a sanni gèlèya.

asimu jawara y'a jira fana ko faso kònò, jèkulu sigilen bë, min ka baara nyèsinnen bë jagofèn w sòngò yèlèma-mali ma. o jèkulu bë to waati ni waati ka nyògonye kë. hakili jugu-

tigiw mana o jèkulu ka tònsigi kòmèn, u bë wuli, k'u jò, k'a fò ko feerefèn w sòngò bëna yèlèma ko kura. o de kama, sukarò sòngò gèlèyara an fè tile dama dò in kònò.

asimu jawara y'a jira ko an ka nin gèlèya kèle, gèlèya min ni jagokèla juguw kèle bë k'o nanbara, k'a bila an sen kòrò, ka sukarò latunun, k'a sòngò gèlèya. jagokèla minw mana sukarò feere, k'a sòngò caya ni dòròmè 87 ye, mògò o mògò mana o ye, o tigi ka kan k'o lase fanga ma. asimu jawara ko k'a jigi ye baarakèlaw ani musow ani maliden nyumanw bée ye, walasa ka jagokèla juguw kèle kosèbè.

asimu jawara y'a fò ko sukarò sòngò ma yèlèma. a sòngò ye dòròmè 87 ye. mamadu sisoko

tinyè de bë laban

mali ani òtiwòlita ka mugu ni kisè ta nyògòn kama dancè ko la, o ye kaba ko ye, k'a da siginyògonya, hadamadenya ani bèn minw bë a jamanadenw ni nyògòn cè, kabini lawale la, fo ka se bi ma.

anw bë min fò a la, o de ye ja- ma k'a hakili sigi, k'i jigi da sòròdasiw kan. an b'an faso dugu- kolo kan, wa mògò si tè se k'an wuli ka bò a kan ni fanga ye.

a dancè ko, hali n'a nyènabòra farafinjamana wèrèw nyèmògòw ka naniya nyuman sababu la, a bë nyènabò tinyè ani laadiriya de kan. a bë nyènabò malidenw ka nafa de kan, hali siga kisè kelen t'o la.

an tè ban mògò ka kuma ma dè. nka, an tè sòn mògò k'an danbe lanògò.

dannaya minèn ka

shèmara

shèbaw ni shèdenw man kan ka nyagami nyògòn na. shè wèrè man kan ka bila u cè fè. o b'u tanga bana caman ma.

dògòkun filanan, sabanan

shèdenw mana dògòkun fila sòrò, dèbèn bè wuli ni ka kogoni kuruni kari. sulu dayèlènnèn bè to tile fè. tufaden dama dò bè to da la, min bè shèdenw bali bòli ma. su fè, shèdenw bè bila kèsuw kònò, minw ka bon dòni. a bennèn bè sisàn, sulu ka furan don o don. shèdenw mana dògòkun saba sòrò, tufaden bè ta ka bò da la, ka da yèlèn ka bila tile fè. dumuniminèn ni jiminminèn dò bè se ka bila kènè ma. shèdenw silan kèsuw bè bonya ka tèmèn kòròlenw kan.

dògòkun naaninan

shèdenw bè dògòkun naani sòrò tuma min na, o b'a sòrò, u si bòra ka caya. sisàn sa, kèsu bè labò. tile mumè bée, shèdenw labila u yèrè ma. sulu bè datugu fo ka taa se tile bin ma. o waati ye shèdenw kolo-kolo tuma ye, ka don sulu kònò.

suma mana jigin fan min fè, dumuniminèn ni jiminminèn bè ta, k'o yòrò sègèrè. ni tile sera kuncè, suma tè kogow la, dumuniminèn ni jiminminèn bè bila shèw lafiya yòròw la. o lafiya yòròw ye gaw ye, minw bè kafo kònò.

o gaw kònò ye mètèrè l ye. u jòjan b'a ta kafo kogo kelen na, ka se tò kelen ma. u kundama ye kafo kogo kundama ye. ga saba bè jò kafo kònò, kafo min shè bè shè kèmè fila bò.

min ka gèlèn shèw bòlen kò sulu kònò sògòma fè, o ye sulu datuguli ye, fo ka taa se tile bin ma.

ni san ko kèra, shèw man kan ka to san na. ni san tigèra ka tile tò to, shèw bè se ka bò. hali ni shè bagatò min furakèra ka kènèya, o shè kelen man kan ka bila tòw kan. a bennèn bè k'a faga, walima k'a feere. nin waati in na, shèw ka kan ka furakè, walasa k'u tanga bana ma. suleyimani mènta

san o san, a ka kan kibarudilalaw k'a jira kibaruka hakili jigin a kuma kumbaba dòw kò, n'o bè kè sabal nyuman sira kan.

o de b'a to, aw b'a dòn anw bè ka min kè su ani ti fu ye, walasa sègèn nò ka ye, walasa kibaru mankut

baara kèlen kana don bògò la

o sababu la, politigi ko ani jamana haminankobaw sira kan, foyi ma kè ni kibaru ma kuma min kan. o ko kumbaba dòw filè nin ye :

jamana kònò kow, minw ye bée jè kow ye, i n'a fò, yèrèmahòrònya kumbèn seli (sètanburu kalo tile 22 don), faransi sòròdasiw taa don ka bò an ka jamana kan (zanwuye kalo tile 20, san 1961 na), sòròdasiw ka fangata don (nowanburu kalo tile 19 don).

mali ani jamana wèrèw jèlèn bè tònbà minw na, i n'a fò : o.u.a. (n'o bangena mè kalo tile 25, san 1963 la adisabeba, etiyopi jamana kònò). mali, sènègali ani moritani ka nafa-sòrò tònbà babolo kun na, babolo min tògò ye ko sènègali babolo. ani tònbà wèrèw, minw nyèsinnen bè ja-kòngò kèle cogo ma, walima dugu jukòro fènw bò cogo n'u don cogo nafa barikama la, ani bagan konyèw, sanfèkuluw konyèw, jamanaw ka bolodi nyògòn ma konyèw, ani dinyè fan tan ni naani bée bée jè ka ko minw kè nyògòn fè (hèrè walima hèrè tana).

olu bòlen kò yen, kuma kèra mali baarakèlaw, a musow n'a denmisèn ka jèkuluw kan, k'a jira ko an ka nyètaa tè sabati n'o jèkuluw mògò kelen kelen bée m'i sèbè don u ka tònw labatoli ma. o dun ye tinyè de ye, bawo mògò, n'i bée jè o jè la, i ka kan, hadamadenya la, k'i se ko bée kè, walasa o jè ka tògò, nafa, hèrè ani kunnawolo sòrò.

jamanadenw yèrè ka bén sira kan, an'u ka kènèya, n'u ka dinyèlatigè nògòyalì nyògòn ma, an da sera kelenya, nyògònfaamu, nyògònkanu, nyògònđemè, hinènyògònna, ani fèerè caman wèrèw ma, minw b'a jira k'an ka kè nyògòn fè, i n'a fò kònò kelen denw, walasa an ka jamana ka kè lafiya jamana ye hadamadenya sira bée kan.

an ko : nyèmögòw ka kan ka dèmè, k'u ka welekanw bato, k'u wale don o don, welekan minw nyèsinnen bè fèn caman ma, i n'a fò : kalan (tubabukan, morikan, balikukan), baaraw (sènè, mònni, baganmara, bololabaara, shèmara), den ko, kènèya, jèya, foroba nafo, sariyaba kura kònò kumaw, mògò degeli a yèrè dèmè cogo la.

nin bée bée kibaru nimòrò kònò. walasa aw ka se k'aw hakili jakabò, a nyinin b'aw fè, aw kana hali kibaru nimòrò kelen fili, aw k'u bée mara, ka to k'u kalan tuma o tuma, k'u faamuya, k'u nyèfò aw ka denbaya an'aw dònbagaw ye. n'aw y'o kè, mali ka baara kibaru ko la, o tè don bògò la abada.

amadu ganyi kantè



kibaru kanu kama

kibaru nafa dònna bè mògò caman fè mali kònò bi. mari tarawele, min bè yòmiyiranbugu lakòliso kòlòsi la bamakò, o y'a dò ye.

a y'i jà ka balikukanlo dayèlèn a wolo dugu kònò, n'o ye banjugula ye, kolokani mara la. a tè fama kibarudilalaw ma tuma si.

a ka balikukanlo n'a ka kibaru kanu kama, an y'a jà bò kibaru kònò, walasa bée k'a dòn, k'a fo a ka wale nyuman camanw na, minw bè kibaru kunkòròta kosèbè.

kan ka fa tuma bée

anbagaw la, u da sera ko minw ma san kònò, walasa k'u
ye, an bée ka da nyögòn na, cikèlaw kunnafoni cogo

e, walasa an ka nyögòn faamuya, walasa baara kana kè
un k'a ka dannaya minèn fa.

kibaru kanubagaw kuma yòrò




san 1974 kònò, o kalo ma kè ni
kibaru kanubagaw ka lètèrè ma bò
kibaru kònò : yòrò kelen kelen ki-
baruyaw b'a la, kuma kòròmaw b'a
la, laadilikanw b'a la, nafasòrò siraw
kunnafoniw b'a la, nyininkaliw b'a
la, hali yèlè kuma fana bè sòrò a la.
an ka foli bè o lètèrè cibagaw bée
ye. bawo, mògò kelen kelen mìrina
ta mana sèbèn kibaru kònò, o bè kè
sababu ye ka hakili di nyögòn ma,
ka dinyèlatigè nògòya.

n'i y'a ye lètèrè dòw bòra kibaru
kònò, o tè k'a fò k'an ye olu dòròn
de sòrò, lètèrè minw cira kibaru ma,
san 1974 kònò, a caya kòsòn, an ma
se k'u bée sèbèn. o la sa, an bè
yafa nyini aw fè. an b'aw ladònniya
fana ko lètèrè minw cira an ma aw
fè, o si ma kè bolo kò fè fèn ye,
bawo olu b'an dèmè, k'a jira an na
k'aw cèsirilen don, min b'a to kiba-
ru bè taa nyè. o kòsòn, an ka foli
ni walenyumandòn b'aw ye.

mamadu kulubali

ka bò ncèso



fòlòfòlò, cèkòròbaw tun tè sòn u
den k'u kalan. nka n'i sera ncèso bi,

cèkòròba ni denmisèn bée ye kelen
ye. nka cèkòròbaw ka ntalen dò ko
wo bè jiri kòrò kònò. bawo olu ye
min ye, an ma o ye.

kònò dugu tè sanfèla ye. a mana
mèn cogo o cogo, a bène jìgin. dò
bannen bè u siya kan ma fo kan wè-
rè. olu b'u yèrè sègèn de. yèrè dòn
ka nyi. musa tarawele

ka bò welesebugu

sèriwusida min bè cikèlaw dèmè,
ka sènèkèminènw lase u ma, n'an
b'a wele ko èsikayèri, o sèriwusi in
de ye wotoro 13 ni misidaba 13 juru
don welesebugu cèmisèn 13 la.

cèmisèn minw bòtò filè ka nin ci-
kèminènw sòrò, u ye san fila kè ka
sènèkè cogo nyuman caman kalan.
cikèminènw juru donna u la walasa
u ye faamuya min sòrò san fila in
kònò, n'u labilala ka taa u ka duguw
la, u ka taa kè sababu ye k'u ka
dònni jènsèn an baden sènèkèlaw ni
nyögòn cè, walasa cikèlaw ka sòrò
bè teliya ni sira caman ye.

cikèminèn minw juru donnen filè
èsikayèri fè, a bè sara cèmisèn ninw
kelen kelen fè san 5 kònò k'a ban.
bè y'a dòn k'o ye dibò ye.

mamadu kulubali

ka bò tègèlèduga

cèkòròba dò ye sagajigi di a denkè
ma, k'a ka taa n'a ye sugufiyè la,
k'a ka saga nin faga, k'a sogo dò
feere. wula fè, n'a bè segin, a ka
na ni saga nin sogo dò ye, ani a
sogo sòngò, ani saga nin yèrè nyè-
nama.

denkè nin bè o kè cogo di ?

mamadi sidibè

nyènajèw

a mana fò ko mògò tè nyè baara
kò, nyènajèw de bè mògò lafiya, ka
baara dusu don a kònò. nyènajè sen
fè fana, mògò hakili bè se yòrò dòw
ma, i tè se yòrò minw ma k'i to
baara gèlèn na.

o de y'a to, kibaru ye nyènajèw
kibaruyaw lase aw ma san 1974 la,
k'a ta ntolatannaw kibaruyaw la fo
ka n'a bila kibaru seli ni balikukan-
lan seli la. mògò minw ye dònkili
da kibaru la, ani minw ye hakili-
sèbènni ci an ma, an ka foli b'u
bée ye.

janto yèrè la...

o yòrò fana bòra ko caman kibaru
kònò san 1974 in na, k'a ta den la-
donni cogo la, ani bana furakè co-
gow, ka t'a bila mobilèti boli cogow
la.

an ka miiri la, o kumaw bè se ka
dò fara mògò ka dinyèlatigè nògòya
kan. o de kama, ni ala sònna a ma,
n'a ma kè aw ma baasi ye, an b'a
fè k'o kumaw sèbèn kibaru kònò ka
taa a fè, walasa bée ka se ka tan-
gali cogow dòn tinyènifènw ma, ba-
wo mali tè bò nògò la abada k'o
ko juguw juru to an na tuma bée.

mamadu sisoko

cikè ni balikukan

fòlò fòlò, mògò caman hakili tun
bè ko cikè ye mògò kalanbalì ka
baara ye. o tuma tèmènna, bawo
sisan, cikè cogo kuraw fòlen kò ci-
kèlaw ye ani sènèkèminènw donnen
kò u ka baara la, bée b'a dòn ko
n'i kalanna, i bè nafa sòrò cikè la
ka tèmèn i kalanbalì kan.

o de y'a to, balikukan sigira k'a
nyèsin cikèlaw ma, k'u dege cikè
cogow la, ani kalanjè ni jate, min-
b'a to dò bè fara cikèlaw ka dòn-
niya kan, k'u ka sòrò yiriwa.

mali kibarusò minisitiri yèrè delila
k'a fò ko kibaru ye balikukan
dafalan de ye. o tuma, a wajibiya-
len don kibaru ka cikè cogo kiba-
ruyanwani balikukan kibaruyaw
lase a kalanbagaw ma tuma bée.
n'i ye san 1974 ka kibaru nimòròw
kalan, i b'a dòn ko kibaru dilalaw
ma nyinè a kò.

halibì, i sènèkèla, i baganmarala,
i mònnikèla, i gadonmuso, ni mògò
min b'a fè ka kunnafoni sòrò a ka
baarakè cogow la, a ka lètèrè ci
kibaru ma. ni ala sònna, o kunnafoni
bè lase a tigi ma kibaru kònò.

basidiki ture

dakan tè falen

cèkòròba dò tun bè, denkè wolon-wula tun b'a fè. u bée dògònin tun ye npan ye.

fa nin ye denkè kòròba bila ka taa filèli kè. a fòra denkè ye ko u fa bè sa nyinan, wa o tèmènnèn kò, npan bëna kè dutigi ye.

u fa nana sòmi o kuma na, a ye a ka nafolo ta, ka kolon kisè kèmè di u bée ma. a ko bée ka t'i ta di i ka mògò sèbè ma. npan taara a ta di ntiginyèw ma.

fa tilara, ka kolon kisè kèmè dan, k'o d'u bée ma, ko bée ka t'i ta di i ka mògò sèbè ma. npan taara a ta di ngòn ma.


cèkòròba seginna ka kèmè dan k'a di u ma. npan taara a ta di jirikon-konkòndoni ma ani manadansani.

u fa ye kolon kèmè dan k'a d'u ma tugunni, ko bée ka taa i ta di i ka mògò sèbè ma. npan taara a ta di dankalancè kòrò ma.

fa nana sa. den tòw ye nyòkisè ni dakisè kolonso, ko ni dugu jèrà k'a sòrò, npan m'o tòmò k'a bò nyògòn na, a bè wulu kolon saya kè sini. npan kasibagatò taara se ntiginyèw ma. u y'a nyininka, a bè kasi mun na ? a y'a nyèfò. olu k'a ma : nin tè ko gèlèn ye, bawo mògò bè nyumaya kè, a ka dòn i ye don dò. ntiginyèw y'o tòmò k'a bò nyògòn na.

banan dò tun bè yen, npan kòròw k'a ma, ni dugu jèrà ka bulu kelen t'o la, a bè wulu kolon saya kè sini. a sera ngòn ma. o y'a nyininka, a bè kasi mun na ? npan y'a kasi kun nyèfò. ngòn k'o man gèlèn. nyumaya kè kun ye a ka dòn i ye don dò. ngòn taara banan in bulu bée kari.

npan kòròw k'a ma tugun : i tilara nin saya la, nka n'i ka binyè ma banan in cèbò, i b'i ka wulu kolon saya kè sini. npan kasibagatò taara se jirikonkonkòndoni ni manadansani ma. a y'a ka degun nyèfò u ye. u taara banan in sògò ka bila nyògòn na. manadansani ye mana da o wo kòndò. a ko npan ka binyè tilen o yòrò ma. npan kòròw nana binyè di a ma, k'a ka banan bon, k'a cèbò. a y'o kè.



munyu kòrò ka di

a bè san caman bò nyinan, aliman jamana min bè kòrònyañ fan fè, o sènèkèlaw bè danni kè awiyòn na. foro la baara camanw wèrè bè kè alimanw fè awiyòn na, min tè danni dòròn ye. o tèmènnèn kò, nafa caman b'a la u bolo, bawo sababu don min bè bolo la baara dògòya foro kòndò.

u ko a ma tugun : npan, i tilara nin saya la, nka an fa ka nturaba min bè yen, n'i nyè kòmi ko saba m'o bin, i b'i ka wulu kolon saya kè sini. npan kasira. a taara se dangan kalan ma, k'a nyèfò o ye. a k'o man gèlèn. i bè taa ne dogo, misintura nin bè siri yòrò min. kòròw nana misi siri. u ko : npan, i nyè kòmi. a y'a kòmi. a kòmi tugun. a y'a kòmi. sinyè sabanan, ntura binna. npan ko : sisán, n'bè n'nyè kòmi aw yèrè la. u ko : kan'a kòmi. i ta ye du fèn bée ye.

nin cogo de la, npan ye dutigiya sòrò, k'a sòrò a kòròw ma sa.

adama cèkura togola
ka bò jana

ka danni kè awiyòn na, fèn don, n'a sòngò ka gèlèn. nka a nafa bo-nya kòsòn, alimanw ye a jira k'olu tè se k'a kè bolo kò fè fèn ye. san osan, u bè danni kè ni awiyòn minw ye, dò de bè fara o hakèya kan. u ka jate la, san 1975 la, danni bè kè awiyòn minw na, o hakè bè taa awiyòn 200 la.

an balima sènèkèlaw, sani aliman ka danni kè awiyòn na, san camanw tèmènnà, u fana y'a kè bolo la, i n'a fò anw cogo. an bè don min na ko bi, sariw ani dannikèlanw bè sènèkèla caman bolo forow la anw fè yan mali kòndò. sènèkèminènw nafa dònnèn bè cikèlaw fè bi cogo bée la.

o de kòsòn, an ye nin kibaruya la-se aw ma, aw k'a dòn ko dinyè sènèkèlaw bèe haminankow ye kelen ye, n'o ye sòrò ni nafa ye. don dò bëna kè, dabakurunin bè bila sari ye. sari fana bè bila tarakitèrè ye. wa o fana bè bila masin wèrèw ye, f'o ka taase awiyòn ma don min na, i n'a fò alimanw fè yen.

ala ka o don jira an na.

èsikayèri


s.c.a.e.r.

bamakò, bp. 787

telefoni 231-43

241-05

telékisi : bankstat 22



ni cikèminèn ani nògò ko b'e
mògò min na, i k'i sen fa ka
èsikayèri magèn joona.

nka, jurusara tuma mana se, i
k'i jija, aw kana tigè nyògòn
na.



èsikayèri ye malijamana ka sòrò samasenba dò ye, n'a bè minènw juru don cikèlaw la, walasa ka yèlèma dòn cikèbòlow la mali kònò.

a bè cikèminèn ani nògò suguya bée nyini k'u doni ka bò dinyè yòrò caman, ka n'u bila cikèlaw ka bolo kan, sènèkèsèriwusi ka hukumu kònò, n'olu ye : kòorisènè sèriwusi, tiga ni suman sènè sèriwusi, moti malosènèsèriwusi, segu malosènèsèriwusi, sirasènèsèriwusi manden kònò, moti nyòsènèsèriwusi, ofisinizeri ani mangasabaw minw sirilen b'u la.

juru sòròli man gèlèn, f'a sarali. o tuma, n'aw ye minènw ani nògòw juru ta aw ka sènèkèsèriwusi fè, a ye aw jija, ni sannifeere tuma sera, k'u ka wariw d'u ma, n'a ma kè ni kèle walima wajibiya ko wèrèw ye.

sènè tè kè konyuman sènèkèminèn kò.

olu nyumanw tè sòrò yòrò wèrè, ni èsikayèri tè.

bedèmu



mali cikèlaw, an'a baganmaralaw, an'a mònnikèlaw, an'a bololabarakèlaw.....

ni mògò min y'a ka wari bila faso tògò la banki kònò, o ye i hakili latigèlen ye, bawo bubaga ni nyinè t'a nyimi tugun, nsonw t'a sòrò tugun, yuruguyurugu mògò yèrè t'a sòrò k'a nanbara. wà, don min, n'i mago ser'a ma, banki b'a ta, k'a d'i ma.

kònònafili minw b'aw la, n'o ye kasara donni ye aw ka nafolow la, a ye dan sigi o la n'aw ka wariw marali ye banki kònò. n'a fòra ko banki, an ka faso yèrè ka wariw mara yòrò ko don. bi, kucala sènèkèla caman ka wariw maralen bè konyuman kucala banki kònò. a tè mèn tugun, nyònòkaw fana bëna u tògò la banki sòrò. n'olu bòra yen, se bè kè nyòròkaw ma, ani yòrò wèrèw.

mali cikèlaw, banki bëna dèmè min k'aw ye, o bè kè sababu ye, k'aw bò nògò la joona, k'aw ka baaraw yiriwa, k'aw ka dugu baanya. faso tògò la banki dilala aw sènèkèlaw ka sòrò yiriwali kama an'a tangali ka bò kasaraw ma.


b.d.m. bp. 94 telefoni 240.88 bamakò



faso jiginèba sigira, desanburu kalo tile 4 san 1959 la, sariya fè, min nimòrè ye : 59-29 filanan, n'o y'a kè faso jiginè ye nyòw ni malow ka sira fè, fo ka taa a bila jiridenw ni nakò kònò fènw na.

opamu ye foroba baarada ye, n'o sirilen tè mògò wèrè la a ka nafolo baara sira kan. baarada in ka wale nyèsinnen bè jago ma, min ye balow ni jiridenw ni nakò kònò fènw sanni n'u feereli ye, an'u jirali sugu wèrèw la. ale de bè nyò, ani malo, ani kaba, ani alikama feere, fo ka taa a bila balo tòw bëe la, ani jiridenw, ani nakò kònò fènw, minw bë sènè mali kònò.

mali jiginèba



opamu, aw bëe b'a dòn, k'o ye faso jiginèba ye. a ka baara nyèsinnen bè sènèfèn sanni an'u feereli siratigè ma. sènèfèn fana bè feere sèriwusi fè opamu ka hukumu kònò, n'o sèriwusida bè wele ko koperatiwu.

faso jiginèba, n'o ye opamu ye, o sèriwusida sigilen bè bamakò. nka, jamana mara yòrò wòorò kelenkelen bëe la, opamu ka mògò sugandilen bè sòrò yen, n'a bë



wele ko "ènsipèkitèrè"

sènèfèn feereli jamana kònò, an'a kòkan, o konyè bëe bë opamu bolo.

opamu ye cikèlaw jigi ye, waati bëe, aw bë se ka nyò ni malo sòrò opamu na, sòngò la, min ka nògòn. cikèlaw minw b'u ka sènèfèn feere opamu ma, o cikèlaw b'u ka sini nyèsigi. bawo, opamu ye misiba jabali ye, bëe ka kan min nònò la.

- CONTENU DU JOURNAL "KIBARU" N°35 DU MOIS DE JANVIER 1975 -

IERE PAGE :

- Le congrès constitutif de l'Union Nationale des femmes du Mali
- Hausse illicite du prix du sucre au Mali
- Le conflit frontalier Mali- Haute-Volta

PAGE 2 ET 3 :

- Poulailler et entretien des poussins jusqu'à 4 semaines
- Synthèse des nouvelles parues dans "KIBARU" en 1974.
- Le courrier des lecteurs
- Travail et Alphabétisation, deux actions à mener de front.

PAGE 4 :

- Le destin est irréversible : une légende d'un paysan-lecteur
- Avec la patience, on obtient tout ce que l'on veut: semaines en avion en R.D.A. (un exemple de l'utilisation de la machine dans l'agriculture).

"KIBARU" SOUHAITE UNE LONNE ET HEUREUSE ANNEE A SES LECTEURS .
